



Broj: 04-04-4-1701/23  
Sarajevo, 5. 6. 2023. godine

**SAOPĆENJE O IZVRŠENIM FINANSIJSKIM REVIZIJAMA  
KORISNIKA BUDŽETA FBIH – OBAVEZNE GODIŠNJE REVIZIJE  
ZA 2022. GODINU**

Ured za reviziju institucija u Federaciji Bosne i Hercegovine izvršio je finansijske revizije 19 korisnika Budžeta FBIH za 2022. godinu, i to Parlamenta FBIH, Predsjednika i dva potpredsjednika FBIH, Vlade FBIH (Generalnog sekretarijata) i 16 ministarstava. Ove revizije predstavljaju obavezne godišnje revizije, sa rokom završetka od 90 dana od dana podnošenja godišnjih izvještaja. Ukupno izvršenje budžeta ovih institucija je 2.205.140.846 KM, što je više za cca 91 milion u odnosu na prethodnu godinu, a manje za cca 475 miliona u odnosu na odobrena sredstva.

Izvještaji o finansijskim revizijama dostavljeni su revidiranim institucijama, Parlamentu Federacije Bosne i Hercegovine, Vladi Federacije Bosne i Hercegovine, predsjedniku Federacije Bosne i Hercegovine i Federalnom ministarstvu finansija, te su objavljeni na internet-stranici Ureda za reviziju: [www.vrifbih.ba](http://www.vrifbih.ba).

Finansijska revizija izvršena je u skladu s INTOSAI-jevim Okvirom profesionalnih objava, a obuhvatila je reviziju finansijskih izvještaja i reviziju usklađenosti aktivnosti, finansijskih transakcija i informacija iskazanih u finansijskim izvještajima sa zakonima i drugim propisima. Za finansijske izvještaje dato je 16 mišljenja bez kvalifikacije (pozitivna) i tri mišljenja s rezervom, a za usklađenost sa zakonima i drugim propisima dato je pet mišljenja bez kvalifikacije (pozitivna) i 14 mišljenja s rezervom.

S ciljem otklanjanja utvrđenih nepravilnosti, te jačanja sistema internih kontrola i finansijskog upravljanja, u izvještajima je dato 217 preporuka, od čega je 126 iz ranijeg perioda i 91 nova preporuka.

Praćenjem implementacije ranije datih preporuka utvrđeno je da je 51% potpuno i djelimično realizovano, 43% je nerealizovano i 6% je ocijenjeno kao neprovodivo.

Kod određenih budžetskih korisnika konstatovane su nepravilnosti koje se odnose na knjigovodstveno evidentiranje koje nije izvršeno na osnovu relevantne dokumentacije i u izvještajnom periodu, što je uticalo na istinito i fer prikazivanje u finansijskim izvještajima.

Utvrđene nepravilnosti najviše se odnose na neusklađenost poslovanja sa zakonima i drugim propisima, odnosno odstupanje od uspostavljenih kriterija za reviziju, od kojih su najznačajniji nalazi u vezi s planiranjem, raspodjelom i nadzorom nad namjenskim utroškom tekućih transfera, koji predstavljaju izvršena nepovratna davanja fizičkim i pravnim licima, udruženjima i nižim nivoima vlasti za tekuće svrhe. Određeni transferi su odobreni za programe i projekte koji nisu bili spremni za realizaciju i koji se ne realizuju u periodu za koji su odobreni; dio transfera dodijeljen je korisnicima bez primjene kriterija koji su usvojeni odlukama Vlade FBIH ili primjenom kriterija koji nisu mjerljivi, zbog čega nije osigurana transparentnost prilikom bodovanja i odabira korisnika. Nekim korisnicima su dodijeljeni transferi iako nisu opravdali sredstva koja su im data u prethodnom periodu. Također, nije izvršen adekvatan nadzor nad namjenskim utroškom realizovanih transfera, kako bi se osiguralo namjensko raspolaganje nepovratnim budžetskim sredstvima.

Revizijama je konstatovano da ni u 2022. godini **nije u potpunosti izvršen nadzor nad namjenskim utroškom** odobrenih sredstava finansijske pomoći u uslovima pandemije COVID-19, niti je proveden postupak povrata **nenamjenski utrošenih sredstava** kod korisnika koji nisu ispunili uslove Uredbe o interventnim mjerama za podršku ugroženim sektorima privrede FBiH u okolnostima pandemije COVID-19.

U izvještajima je skrenuta pažnja na određena značajna pitanja, koja se odnose na:

- **isplatu naknada zaposlenicima za rad u komisijama**, s obzirom na to da pravo na naknadu pripada samo u slučaju kada su poslovi obavljeni nakon radnog vremena. Isplaćene naknade **članovima komisija nisu imale tretman prihoda od nesamostalne djelatnosti**;
- **revalorizaciju stalnih sredstava**, koja nije izvršena iako je, prema podacima Federalnog zavoda za statistiku, rast cijena proizvođača industrijskih proizvoda u 2022. godini iznosio 17,4%, što je više od 10%, kada je potrebno izvršiti revalorizaciju;
- **otvorene namjenske račune izvan Jedinstvenog računa Trezora** za realizaciju razvojno-investicijskih projekata finansiranih iz kreditnih i grant sredstava kod pojedinih budžetskih korisnika, za koje nije uspostavljena knjigovodstvena evidencija i ne sačinjavaju se finansijski izvještaji;
- **nedovoljno i neefikasno obavljanje poslova iz nadležnosti** određenih budžetskih korisnika;
- **nekonzistentan pristup kod donošenja odluka o radnom vremenu i vođenju evidencija o radu**;
- **nedovoljne aktivnosti na uspostavi interne revizije** kao jednog od elemenata koji, s finansijskim upravljanjem i kontrolom i Centralnom harmonizacijskom jedinicom, čini sistem javnih internih finansijskih kontrola, i koji treba osigurati razumno uvjerenje da se u poslovanju korisnika javnih sredstava osiguralo zakonito, transparentno, ekonomično, efikasno i efektivno upravljanje javnim sredstvima.

Očekuje se da u narednom periodu Parlamentarna komisija odgovorna za reviziju organizuje rasprave s rukovodicima institucija u vezi s ovim revizijama i time podstakne na implementaciju preporuka i otklanjanje utvrđenih nepravilnosti.

U prilogu je pregled revidiranih budžetskih korisnika, datih mišljenja i broja preporuka. U skladu s Planom revizije za 2022/2023, preostali izvještaji finansijske revizije bit će sukcesivno objavljivani, po okončanju.



**Pregled datih mišljenja korisnicima Budžeta FBiH za 2022. godinu**

Red. br.	Korisnici Budžeta FBiH	Dato mišljenje za		Ukupan broj datih preporuka za 2022. g.	Broj nerealizovanih preporuka iz prethodnog perioda	Broj novih preporuka za 2022. godinu
		finansijske izvještaje	uskladenost			
1.	Parlament Federacije BiH	Pozitivno	S rezervom	14	9	5
2.	Predsjednik i dva potpredsjednika FBiH	Pozitivno	S rezervom	13	10	3
3.	Vlada Federacije BiH (Generalni sekretarijat)	Pozitivno	Pozitivno	7	4	3
4.	Federalno ministarstvo unutrašnjih poslova	Pozitivno	Pozitivno	4	2	2
5.	Federalno ministarstvo pravde	Pozitivno	S rezervom	12	8	4
6.	Federalno ministarstvo finansija	S rezervom	S rezervom	27	19	8
7.	Federalno ministarstvo energije, rudarstva i industrije	Pozitivno	S rezervom	14	8	6
8.	Federalno ministarstvo prometa i komunikacija	Pozitivno	S rezervom	14	9	5
9.	Federalno ministarstvo zdravstva	Pozitivno	S rezervom	20	13	7
10.	Federalno ministarstvo trgovine	Pozitivno	Pozitivno	4	2	2
11.	Federalno ministarstvo prostornog uređenja	Pozitivno	S rezervom	8	5	3
12.	Federalno ministarstvo poljoprivrede, vodoprivrede i šumarstva	Pozitivno	S rezervom	11	5	6
13.	Federalno ministarstvo za pitanja boraca i invalida odbrambeno-oslobodilačkog rata	Pozitivno	S rezervom	11	6	5
14.	Federalno ministarstvo razvoja, poduzetništva i obrta	Pozitivno	Pozitivno	4	2	2
15.	Federalno ministarstvo rada i socijalne politike	Pozitivno	S rezervom	13	3	10
16.	Federalno ministarstvo kulture i sporta	S rezervom	S rezervom	17	10	7
17.	Federalno ministarstvo raseljenih osoba i izbjeglica	Pozitivno	Pozitivno	7	2	5
18.	Federalno ministarstvo obrazovanja i nauke	Pozitivno	S rezervom	9	5	4
19.	Federalno ministarstvo okoliša i turizma	S rezervom	S rezervom	8	4	4
	<b>UKUPNO</b>			<b>217</b>	<b>126</b>	<b>91</b>